

四庫全書

集部

欽定四庫全書

集部

甬上耆舊詩卷五

六

詳校官右中允_臣薩敏

主事銜_臣徐以坤覆勘

總校官庶吉士_臣朱 銓

校對官學正_臣常 循

謄錄監生_臣趙廷璋

欽定四庫全書

甬上耆舊詩卷五

監察御史胡文學編

序曰甬上古耆舊之國也方秦末博士大里黃先生
邈然避世時天下有四皓先生其一也至盛唐開元
間賓客賀季真先生為詞家舉首歸賜一曲四明逸
老名重本朝及宋慶厯朝鄞江桃源二王先生淳熙
朝禮部侍郎袁正獻公與同郡諸賢後先並著稱為

四明九先生而後吾鄉風節文章理學遂並著于天下自洪建以來鄭李諸先生始作斯文復歸雅馴循至成弘之際海內久治平氣淳俗厚人風益高于時名薦紳若兵部洪公常給事盧公瑀太僕金公湜六七人俱解組歸田因得從高士宋弘之恢張景心憬先櫟軒諱端諸先生相結為高年詩會每值風日佳時輒剪蔬供款驩共為集逍游散帶里人望之若仙嘗追遡諸公生平洪兵部與于忠肅公為左右手有

安社稷勲晚脫虎胎益倡雅里中盧公名諫臣直聲
廉操重于一時兵部嚴公端至行軼倫復以古文名
家刑部宗公佑循吏之後于集中齒最少正術周先
生祐高士章先生珍並詞家名宿宋先生集先輩遺
詩有功文獻張先生以詩法傳其從孫琦為吾鄉詞
人之冠倪先生光善言易名北京焦金太僕與先櫟
軒先生風格更上詞賦之妙傳于朝鮮日本為中朝
增重諸公詩各擅風人之致要皆解外膠畧世事身

當太平之日從容吟唱以鏗鏘盛朝四方望甬上擬
于唐履道里焉此俱本東沙張公所述再詳于郡乘
而董山李先生更別載宋章諸高士俱哀然人師不
媿真隱凡屬會中唱酬徧傳于遠近合二公所記十
有八人俱歷然可考余因得于暇日輯諸公詩惟金
太僕倪高士俱有遺集可錄其餘諸家散見于他選
雖單章片律亦必隨鈔復慎擇其可傳者入各數首
且彙為一卷特相詮次意使太丘朗陵重聚于一堂

漢陰主客歡情更接然後諸先生音欬相聞無復契
闊即開卷讀之亦若身為其門人弟子恂恂然相從
于杖履之後也獨是董山先生去諸公纔二十餘年
節奏可尋流風放恣而即謂社詩漸逸無從彙錄望
得如謝方石先生為赤城詩選以著一鄉之論此懷
闕然余乃更從二百年後圖相採綴于當時會中詩
豈可復得唯錄其平生遺草光響畧存庶學者得自
今日仰溯西漢而下世有老成足發恭敬亦稍補董

山先生闕然之懷云爾及余選先輩遺集上下千百年因盡名曰甬上耆舊詩益使後人識此邦二千年人文熾盛惟藉大里黃公後數人至此集諸先生身後餘音幸附金石得列為四明文獻之邦也集成錄詩凡十一人俱有傳餘七人詩失傳亦附姓名于後

通判鄒閭

高士王政

余賓

理問周頌

袁德麟

周愷

陳渭

兵部郎中洪公常

公字子經號石田性高邁強記博通家貧常從人借書一覽輒盡中進士觀政兵部時于忠肅公為侍郎一見竒之即薦公有經濟才特授本部主事會土木之變忠肅進尚書一時軍事舛錯盡以相屬忠肅每入朝公輒具筆札以從事至且語且疏即不具草立上忠肅既幹畧絕人復仗公為左右手遂得指揮定難稍遷至郎中上皇復辟吏指公為忠肅黨上知其

名特原之陳汝言代忠肅復以事誣公欲致之死上
竟置不問後馬恭襄公昂為尚書值西陲多事馬公
嘗面陳部曹乏人上顧問洪常安在以憂去對即命
起復公至部久之馬公疏薦公為本部侍郎忌者知
其事先劾馬公私所屬公遂力請疾歸里進階朝列
大夫公時年甫四十自念與忠肅同事特蒙上知得
不死再脫虎眚俱上所賜餘年因日與里中耆舊相
聚雅歌鼓缶以頌太平歸田歷三十餘年非歲時鄉

飲不至公所蕭然一室以文章自命晚年得所未見
書必手鈔始讀所著有勉學錄石田槁隨筆考文業
考及選定韓柳歐蘇王曾六先生集公生平履操廉
白尚義在兵部時出入常無馬武平伯陳公重其名
奉八十金為市馬至再却不受同里李主事山如清
操絕俗歿後公身為經其喪諸高義率此類

懷鄭汝誠

端居鬱無聊引領懷三益相違念一朝况茲歲屢易雲

樹渺關河之情安所適歡娛日以踈憂愁日以積絨題
寄便鴻相期崇令德

宿美古韶方丈

何處堪尋物外交羅雲丈室絕紛淆老僧掃榻應相候
童子開門不待敲花外雨腥龍出鉢松間雲暖鶴歸巢
滿懷清思渾無寐卧看流螢度竹梢

都給事中盧公瑀

公字希玉號益齋以進士授刑科給事中即劾巨璫

梁芳等竊柄引用奸僧繼曉以邪術罔上直聲大振
嘗疏罷淮陽貢賦十餘萬緡陳西北市馬積弊人俱
德之有温州衛指揮戴勲以遺孤為庶長所孽庶長
賕結當路多為其地公知狀言于尚書馬公文升事
竟得直勲後知公言奉二百金賻公母之喪公力拒
不受服闋遷工科都給事中論天變忤旨廷杖置于
獄謫判長沙稍遷同知真定府為治善撫良詰暴吏
民愛畏之尚書王端毅公恕見所上治行旌異之遷

知廣平府廣平故牧馬地豪家數侵匿委其徵于貧
戶公至剡洗宿蠹盡反所侵地民困大起乃命起學
舍養士授以經義三輔間翕然嚮學有張叅將者以
高貲甲郡中為讐家所誣繫獄前守意避嫌置不理
公按牘出之比公引年歸參將使其母密懷千金為
壽致榻上公堅謝不受其廉白始終不渝若此公為
人不輕言笑口未嘗論人過少美風儀有隣婦製一
紉袴遺之公斥去默然終身不至其門有知者重之

閨情

錦帳徹流蘓寒燈對影孤其如天上月千里炤征夫

題竹

幽人愛竹看不足更剪生綃寫雙玉瀟灑何如渭水姿
扶疎畧似淇園綠初垂露葉朝氍毹乍拂雲枝春漠漠
竹根竒石一拳小共抱堅貞永相保

兵部員外郎嚴公端

公字克正號謙齋以進士稍遷南京兵部車駕員外

郎所職黃馬快船公為監凡巨璫有冒請公輒持不許遂為積忤所中解組以歸公性至孝自歸田母年六十公奉養歷四十餘年母年百四歲朝夕不敢離左右母齒豁不能飧公手屑良米煑粥操匕箸以進問母有所欲輒力致之少疾即束帶至旦身嘗五藥至母體復始就寢方母百歲時公率孫曾長跪上壽烏紗鵲髮相炤庭除間公自視若兒孺子也見者稱為盛事及居喪哀毀彌至公為人性樂易然持操甚

嚴家無餘財周人之急意常若不足其學貫串百氏
為詩古文詞高軼超麗自成一家凡里中有欲考議
古今多造門辯問公為隨事畫對歷歷有徵學者俱
宗之所著謙齋集藏于家

公起里中以古文名家居官為健吏處林下奉母至
四十餘年母壽歷百餘歲尚作孺子驩身列孝友傳
中此誠世所謂吉人也時稱公為詩奇俊脫俗更妙
于體物而今傳者甚少幸錄其一詩稍見風概吉人

之詞雖少而彌重也

游福德菴

湖海當年已倦游
風波無地可藏舟
何如今日城西寺
半醉花茵卧石頭

太僕寺丞金先生湜

先生字本清為人氣體甚高自童時輒能詩長益漁
獵史籍舉于鄉以善書法授中書舍人待詔文華殿
遷太僕寺丞督山東河南馬政初監牧者多以墨敗

士林畏居之公笑曰誰謂必廉泉方可飲耶即日乘傳詣部盡釐剔宿奸風節大著時俱曰此公誠金鑄人也因薦敕賜一品服宣詔朝鮮其國雅尚文學陪臣聞公有詩名請留詞翰公即席草答數十首文義溢發自王以下盡驚曰前天使所未有也因請公使節所歷文章鐫諸國中名曰皇華集復選美人侍夜公贈以小詩笑遣之諸餽貽盡却不受還朝遂請致仕屢徵不起家居三十年足不一跡公府即族黨慶

言亦謝不往唯里中耆舊觴咏為集居嘗坐卧一小樓嗜學至老不衰嘗曰吾平生喜讀易聞造化之微適有所得即渙然有餘樂他書則未然也為詩多逸韻篆隸行草俱有漢晉人風性嗜竹因善寫竹每命筆姿態橫生率題小詩于上人稱為三絕喜杖策過禪舍所交多高逸沙門一日口占一律示僧有謝世語後數日果卒公事親至孝執喪盡禮待詔時以書法薦其弟溥併入直與諸弟姪分田宅多讓肥美人

以是益高之

太僕居里門蕭然四壁風格最高每畫竹輒有一詩
楊文懿公每稱太僕先生重其筆墨謂在子瞻與可
之間晚年嘗過湖南延慶寺為老僧畫竹一紙懸諸
寺壁後時過之輒加題一絕積至十首及垂老復至
寺中見尚有素處一方即欣然命筆曰草堂南北路
高低林下相逢日又西只為詩多不礙竹幾番題過
又重題以後遂不復過今此畫為好事家所得尚傳

在人間先輩人風良足愛重也

河間府瀛海驛寫竹遂成長句

我本東南瀛海客乘興來登瀛海堂堂中開簾分廣席
四壁拂拭如秋霜老夫見此發長歎便覺清風滿穹昊
呼童捉筆破水墨胸中恍惚窺天造何須巧作鐵鉤鐫
何須苦效金錯刀大竿小挺恣揮洒千枝萬葉分秋毫
雲氣淋漓墨初濕隔窓似聽湘妃泣兔翻鵲落魑魍愁
一夜轟雷破春蟄蟄龍振起風怒號蒼烟翠霧翻波濤

鯨鯢帶雨走平陸靈鼉跋浪聲嗷嗷從來造化不可測
呼噏陰陽在頃刻簣簞谷口冥烟開白日龍來作人立
黃堂太守人中英殷勤置酒當前庭大觥小觥迭相舉
賓僚進退如諸生我亦平生好奇絕為作長歌歌一闋
樓頭羌管落天風筆底驚蛇走冰雪歌罷出門呼驛吏
叮嚀戶牖須常閉只恐天工有使來一朝捲入空中去

題唐明皇吹玉簫圖

昭陽殿高淸畫長珊瑚枕壓七寶牀珍簟平鋪碧雲冷

珠簾半捲秋風涼此時諫疏非無補君王自喜教歌舞
舞曲翻成阿濫堆別調新傳玉簫譜玉簫一曲度薰風
宮商十指何玲瓏碧沼游魚窺菡萏丹青彩鳳鳴梧桐
梨園弟子多白髮承宣獨喜黃幡綽手提玉板不停敲
足蹋青蒲恣歡謔雙雙粉黛誰家女霓裳細拂鮫綃縷
斂袖低眉不動塵似解烏烏曲中語從來聲色移人心
人生樂極悲亦深豈料簫聲入雲去化作漁陽鼙鼓音

過劍水有述

此地重經雨後過其如風物悵人何
水忘舊澗橋梁少
路啓深山草樹多
行客有懷頻問蹟
土音無字易傳訛
新攜一劍千金值
欲向巖前試一磨

觀劉廷美秋官草書

二王消息渺飛鴻
今代劉生筆最工
戲解都盧身似縮
舞看渾脫劍成風
一池春水驚羣白
數屋秋霜柿葉紅
况復才兼詩畫好
高名愁殺米家翁

寄大嵩舊游

孤城如斗倚岩阿
疋馬曾經此地過
行盡青山無虎跡
望窮滄海息鯨波
雞豚里社間田少
斥鹵疆場野竈多
獨記南樓同醉日
落花如舞鳥如歌

游天童寺過中峰

行盡青松始見山
煖風微雨露班班
欲尋開士栖禪處
直到中峰疊翠間
滿地竹陰人跡少
四檐花氣鳥聲閒
素甕傳後悠然別
不許袈裟送出關

過丁家嶺

嶺頭松樹插天青
嶺下人家舊姓丁
沽酒且須尋地主
將詩不必弔山靈
問誰別有神仙骨
顧我真成老鶴形
回首遼陽三百里
落花啼鳥盡冥冥

楊柳美人圖

簫管聲沉午夜春
六宮誰尚步香塵
垂楊影裏濛濛月
獨照長門失意人

題多景樓

滾滾江流動地來
重重樓閣倚天開
行當草罷平羌詔

乞取青山作釣臺

題延慶寺畫竹

咫尺南湖幾度過頻將詩興付清波
詩成欲寄林深客閒放春風出薜蘿

行到山門似到家相逢不必具袈裟
誰知七月秋風裏香茗新烹薦筍茶

一竿瀟洒玉玲瓏湘圃淇園在眼中
過客莫嫌枝葉少纔多枝葉便多風

湖上禪房對竹開
雨餘新水綠生苔
入門聽得茶童語
昨日題詩客又來

題竹雜咏

偶騎黃鵠到人間
除却吟詩只自閒
兩翼清風收不住
又隨寒雨過溪山

四明山下一綸巾
把筆曾為竹寫神
莫笑老夫輕自許
湖州太守是前身

漠漠春風澹澹烟
瀟湘江上最堪憐
十年不寄平安字

一夜秋聲到枕前

卧起書窓酒未消
呼兒磨墨我揮毫
須臾一片湘江雨
亂逐秋風洒鬢毛

北地天寒少竹栽
客居終日苦黃埃
昨宵適有還家夢
直向江南貌得來

昨日投閒列竹林
已看林下筍抽簪
題詩為報三春雨
莫遣長梢易作陰

雨後雙鉤寓未成
幾番閣筆聽秋聲
琅玕本是無心物

移到詩家便有情

每見長安好事家
年年栽竹似栽花
誰知一過江南去
看盡山巔與水涯

城市園林多種花
山中老竹自歌斜
時人只解看花好
看到秋來有幾家

刑部員外郎宗公佑

字元吉父顯初知宜興有惠德時尚未有子民為聚
禱于神遂生子因名曰佑少即有文名中進士歷官

刑部員外郎以守制歸卒于家士論惜之

寫懷

無端世事幾曾諳寂寞何從問指南排戶祇應知己過
披衿未有俗人談松堪獨對髯方老菊未全開辦尚含
漫擊鉢聲佐長歎一天風雨閣烟嵐

陰陽正術周先生祐

字立德以辟薦授陰陽正術少有詩名為一時所重
人稱栗軒先生嘗與魏雲松相倡和所聯句工力悉

敵而栗軒集竟失傳同時若薛元禮先生以司稅楊
梅讀先生以倉副使先生以正術俱小官名重今城
南有周正術墓梨花纍土行人過之猶知為詩人藏
骨處吾鄉前此公侯卿相甚多以此一坏較彼墓亭
翁仲誠不與易也

送金進士德潤與魏雲松偁作

聯句

昭代產佳士

祐

立行卓先覺登崇願方殷

偁

追遠誠獨

確出系幸未刊

祐

征途敢辭邈華騎綠駸駸

偁

錦衣晝

濯濯冥賁徹重泉

祐

家歡罄一握爭知才特奇

偶

總羨

貌純朴康藪出麒麟

祐

文岐來鶯鶯語正出咿嚶

偶

行

危齊犖嶷量容渤海深

祐

清脫沮洳濁文藉嶽嶠攢

偶

玄微繭絲摧詞藻或紛敷

祐

天葩靡彫斲李驚起爾神

偶

柳見嶄然角彪文孰能加

祐

龍變不可捉允矣德言

偶

久而交致慙囊橐周宴宜

祐

蒸嘗餽賓數葭莩獲

相因

偶

枝葉藉無剝跋涉延歲元

祐

逶蛇逗秋朔我私

濟遑究

偶

我公勞罔違仇離心若擘

祐

岐分手仍搥檻

檻聲更和

偶

駢駢色不駁君器自軒皇

祐

我疵誰磬琢

廷猶需補裳

偶

國不遺彫璞惡艾楚畹資

祐

芳擷香漬

葯士類易淳龐

偶

土風捐醜齷化宣放勲仁

祐

和贊鈞

天樂既哲居鼎台

偶

匪彭侍帷幄瀆詞致瀕行

祐

明達

豈孤學

偶

送章黃門元益待漏與魏雲松

偶作

聯句

宵寤念朝趨蒼茫遲晨漏

祐

低橫默屏營直簡端宿留

偶

天北杓乍旋極東光未逗

祐

通工鵠翥繁夾掖鴈行

筵

偈

兢爾緗絲紘肅然檐綺綬

祐

王郎記遐懷杜老詩

端懋

偈

瀑馬靜攢蹄司雞竦動咄

祐

樂部駐旌旌羽林

羅介冑

偈

花露零以灑柳烟冪而秀

祐

遲遲箭刻深浸

浸壺聲驟

偈

捫衷荷錫榮委質須匡佑

祐

昧爽鼓鐘希

簪毫入祇候

偈

哭長清李處士

長清李處士鄉國足稱賢舊德崔門重遺經伏氏傳非
疏四座客烟草兩湖仙今日嗟何在山庭宿雨寒

送金子還滇南戍所

西風把酒贈驪歌駐馬含愀意若何書劍又從關外去
年華半是客中過楚江樹色經寒早巫峽猿聲向晚多
到日轅門應有問為言東海靖無波

章先生珍

字文重自天順成化以來文重與張景心宋弘之先
櫟軒諸先生俱以布衣宿望為里中五經師啓後鳴
時不媿真隱先生少為文學胡平仲書法仿宋克而

變自成一家詩溯漢魏以至盛唐諸大家能造其妙
生平喜讀易有易注若干卷孤舟夜讀一卷它所著
勾章小家言二十卷並藏于家先生卒後魏雲松先
生哭之曰九原詩癖應如昨月白花開對墓門是足
使人追味也

古意

結髮游三輔垂老守一城月皎天漢流厭聽橫吹聲來
時家平安于今竟何如中心徒徬徨路遠不得書長河

無波濤日暮游子歸草深山雉鳴水滿野鴨飛丘隴多
新墳其誰主蒸嘗折葵循野籬煮飯解行囊

豔歌行

和風散晴靄冷露晞春陽步出閨中姝採將陌上桑冶
容事窈窕穠豔飄芬芳髻擁黃金釵耳垂明月璫湘綺
以為衣紫羅以為裳使君愛青年下馬揖紅粧為言孤
鳳鳥欲效雙鴛鴦妾身名家女夫壻侍中郎豪氣萬人
上美軀七尺長朱門白玉堦錦鞍青絲韁爾今在長坂

妻亦守空房游俠恐相繼能忍容為娼

劉生

不事魯儒文談兵動主君開弓學明月射鴈落黃雲桃
葉迷歌扇榴花醉舞裙遨遊五陵地結納李將軍

良人

良人越河關歲月忽已久灼灼庭中花蕸彼庭前柳陽
春被萬物芳草亦含歡如何遠別離長江路漫漫漫漫
江河長迢遞不可逾相思發長歎視我明月珠

贈所知效陶體

峩峩青山下小屋十餘間
禾黍滿東臯桑麻翳後園
日出讀我書日入高枕眠
相知無心曲惟此門前山
好鳥歸深林白雲宿層巔
陶然得真趣悠悠樂吾年

擬曉發五溪

舟發川中路孤吟背夕曛
秋聲巫峽水冥色夜郎雲
野店青山繞溪橋綠樹分
採菱歌棹遠風靜有時聞

送張二貢士

烟靄散春晴
亂鴉深樹鳴
千山懸落日
一騎出孤城
急管催離宴
飛花亂旅情
殷勤懷上策
謁帝向承明

東湖別業

老年厭城郭
湖上最相親
疎雨斲山蕨
東風采礪蘋
鳥啼林樹晚
鹿下野塘春
當路多奇士
誰能訪隱淪

無題

溪橋春水生
新蒲綠堪把
茆屋掩松雲
斜陽鳥飛下

題鄭汝誠所藏山水圖

南山春雨晴西溪春水滿孤舟釣夕陽沙明綠蒲短

宋先生恢

字弘之以經術授里中子弟及門最盛陸康僖公瑜
其最著者也先生嘗憫郡中文獻失徵因選天順成
化以來諸名士詩合為一集冢宰碧川楊公見之深
善其意因從鈔一本以授子茂清即知州芝山君也
其後叅議南江戴公更從芝山處得此集因為增輯
序之曰余嘗慨想鄉賢篇什思搜訪而不可得一日

從芝山楊君所見四明雅集一編乃詩人宋弘之先
已纂輯因取諸家近詩增所未備總得六十人集成
四卷不惟吾名山之助其文獻亦有足徵者故樂為
邦人道之吾鄉有選詩本于此

教授鄭千之先生家學淵源最久其為四明文獻錄
所集宋元先輩詩僅四家自其大父蒙隱先生父以
道先生外一為奉川董秉彜一為吾鄉蔣敬之然則
所錄里中詩只一人而已余復盡讀宋元志乘所載

詩亦絕少太守沈公愷序吾郡詩曰宋元間攻尚互異篇什不傳在當時固已如此然亦由纂述無人致傳者益少也至宋弘之先生始錄天順成化間名士詩二十人曰四明雅集于是南江戴先生因所選為廣之得五十五人仍其名東沙張先生益廣之得一百五十一人更名曰四明風雅至崇禎中陳太僕陸中翰諸君復耑錄吾鄞詩得四百四十七人名曰甬東詩括蓋此邦文獻之傳數百年間得世有所徵俱

宋先生祖構之功也南江謂先生詩格逼盛唐其栢
梁體最妙調高而意遠今所傳者絕少余為錄存數
章使後來學者追述先民得知其世系焉

寄洪郎中

瓊林有鳴鶴皎皎霜雪姿飄飄自遐舉雲中揚羽儀朝
飲玉池水夕啄玄圃芝發音起千仞逸響聞天衢靈雛
善相和知為心所縻安得晨風翼萬里常相隨

訪楊維立進士留贈

虛齋坐岑閒幽懷曠難任美人久不諧紆鬱傷我心出
門愛春熙濯木栖鳴禽輕舟溯長川弭擢楓江潯高扉
俯流水竹樹蔭成陰升堂欣良晤載聆金玉音韋布分
樗散幸茲挹華簪燃燈炤行觴獻詠鏗璆琳遂忘夜漸
中天低舍後參餘興屬枕藉晨雞徹雲林分攜聊贈言
庶以酬南金

送戴使君之任雷州

有美吾鄉彦丰姿冰雪涵鴻文歸藻鑑高譽動華簪題

駕方齊右分符遂粵南朋儕分祖席徒御擁征驂駮駟
初當道青萍已拂鐔寒雲凝楚峽春樹滿湘潭執轡登
岩曲褰帷轉石龕亂山遙入桂巨海渺連儋萬井依蠻
市孤城倚瘴嵐漢儀應共仰蠻俗自徐諳設匭求新政
還珠異昔貪檳榔非足嗜魚膾亦忘甘戶集民無訟庭
閒吏罷叅清時將注用玄髮未為淹

哭長清李處士

垂白傳經鄮水東曾聞人譽重和雍天衢終嘆蒲輪杳

雲壑長哀總帳空者舊一時堪補傳老成百世自流風
獨憐帳下諸生在徒對高堂哭馬融

張先生憬

字景心少有詩名更善于書法時謂其詩音律沖妙
超然有復古之功同郡都御史張公楷雅以詩法自
許唯于先生最相引重晚年學道居吳山之紫陽宮
遂不復出以詩法及書傳從孫琦盡得其妙即所稱
白齋先生為吾鄉詞人之冠者也故推其家學所本

特書之

聽鶯曲

默坐湘簾垂啼鶯在高枝初啼君已去再啼君不知

挽宋龍川先生

慄慄北風勁百草腓且僵白日失中舍慘淡寒無光漫愁思多激烈歌聲長浮雲結重陰俯仰內自傷揮劍出長坂我馬玄以黃川流移東溟葵藿傾太陽端居顧安適誰能履周行崔崔玉山岡孤墳鬱蒼蒼猗猗蕙蘭

花千古含芬芳

送友之京

金氣應高秋
憐君復遠遊
天涯冠蓋士
雲裏帝王州
鴈下孤烟斷
帆行落日收
吾兄淹宦久
爲報別離愁

秋日宴海昌硤石東山

東山此日會
詞英霜落天
高秋氣清
風度鐘聲諸
刹近雲開
日色兩峰晴
葛洪井上烟
霞老顧况臺
前草樹平
臨眺不須懷
往事故鄉回
首獨生情

倪先生光

字應奎少有文名會感土木之變復學孫吳書講劍術既久無所合乃更杜門學易忽意思朗徹若有神授遂盡棄世事曾一客京師名動諸公卿間大學士萬公安將論薦于朝即日謝歸先生自讀易有得輒能前知嘗在楊文懿公所有中貴使至先生見一雀自庭樹集于地已還集樹即謂其使曰頃來得非失馬耶六日當復使大驚楊公質之先生曰雀踊躍物

也去樹而集于地舍所依也還集樹復其所矣初集
自北而南水數六故曰六日當復又問馬色曰以水
色尅火當黃而近于黑語畢驗都御史王公應鵬童
子時至先生所甚奇之王適作一莊字先生曰蒙莊
書開卷輒云鵬翔童子與名合不可量也以其甥妻
之客有問嬪將產者傘忽裂其人失色先生曰傘外
裂則小人見君喜得子矣其前知類如此人因以小
康節呼之學者稱味易先生唯與金太僕魏雲松先

櫟軒三先生交最深脩然人外高企羲皇年八十生
而舉殯擬陶公自祭杜牧之志墓事懸像設奠延慶
寺為詩自挽羣公俱屬和太僕先生別畫竹題一詩
相寄曰先生舉殯吾為寫生其詩有言舉世稱高士
闕天合少微先生得之大喜其作達如此

前輩謂先生古詩最工七言効初唐音格流麗近體
不減王右丞其味易詩集凡十二卷不知為何僉所
刪僅存律詩二卷余往問其家前集亦不存矣因即

所選錄存二十餘首復採其佳句如秣陵道中曰路
柳官橋晚山花野店春寄金文用曰萍開魚弄日花
落蝶愁人泊瓜州曰平林藏宿霧踈雨帶春潮隱居
曰岸風落藤子晴雪上梅花宿山家曰水清溪近戶
楓老葉歸林間居懷鄭蘭谷曰燕窺花徑暖鶴護草
堂清病起有懷知己曰海濶成鷗夢風高斷雁心幽
居曰埜雲當戶過青草閉門閒送李公子還鄉曰江
風催去櫂戍鼓接行裝過七里灘曰白石依樵爨青

山隱釣臺遊崇法寺曰青山應作主黃鳥自留人遊
東林菴避暑曰殿涼雲氣入池午藕花開屏跡曰遠
山隨水下細雨帶雲流早春遊虎丘曰萬水浮光去
諸峰積翠來游上天竺曰萬竹岩前雙鹿卧百花林
外一鶯啼育王寺曰天垂紫氣籠雙塔路引青松入
兩廊奉寄尹天官曰陰崖短竹含霜老幽谷薜蘭背
日生題蜀中山水曰路遠山川通漢時花明樓閣入
唐風客中書懷曰蘿偃破籬花自老門生新竹燕還

飛弔岳墳曰宋樹參天無北向吳江抱地盡東流雨
後閒行曰新水短蒲魚戲日暖風新巷蝶尋花俱氣
溫詞麗真不亞盛唐也

送日本副使梵苗公

東渡海潮起瓊筵別上人帆開行漏盡香逐賜衣新月
白元無夜花明別有春雲山千萬里天遣幾相親

西陵夜宿

衝岸夜潮響客居愁自生遠汀漁火起隔岸寺鐘鳴簾

破流螢入雲移睡犬驚山螢又啼近盡夕夢何成

游紫霄觀

臺殿層霄近烟霞一徑連懸崖生古樹小洞出寒泉
果落黃猿笑花深白鹿眠玉簫吹向客鶴舞月娟娟

宿清村

地濶江流險天空山勢高望鄉雙淚落為客一身勞
斜日飛沙鳥西風動莖蒿獨舟依岸宿深竹夜騷騷

老狂

浮生自落魄非復晉風流
雲卧借僧榻雪行問釣舟
青山入孤興綠酒散閒愁
老去任頭白乾坤一野鷗

懷金太僕

每憶金居士交游獨見憐
清風落疎竹白首問寒泉
詩社幾人在湖山空月圓
此生不復見風雨泣長年

訪茅山張鍊師不遇

客中曾有約孤騎入茅山
一水落天上亂雲生竹間
花深谿路遠松老洞門閒
採藥不知處月高猶未還

擬唐人得日觀韻

曉入蓬萊境看門鶴一雙老松歌澗石垂蔓護山窓林
響風生島亭虛月湧江投壺人去遠烟冷酒空缸

訪靈隱寺

柳暗蘓堤路行行二月春草香隨蠟屐松影落羅巾
鳥近啼竹山蜂遠趁人老僧相見好留宿話前因

半村為毛廷輔賦

郡曉聞鐘漏門前人賣花郭田留野鶴庭樹宿城鴉園

逕通漁市河橋近酒家柳塘橫客棹風月賦桑麻

夏日園林即事

洗竹搖雲斷看山坐日斜
趁晴收野艾臨晚摘園瓜
行蟻沿枯柳羣蜂戀落花
夏鶯啼不斷于此惜年華

訪仙遊觀

遙入仙源路碧雲深處幽
洞門雙白鶴花徑一青牛
別境天無外長生草不秋
偶逢樵者問元日會蓬丘

上雪竇寺

垂老尋山寺山林別有春
路花迎笑客埜鳥自呼人
斜日催行騎西風落醉巾
到來圖畫裏天上一間身

雨後有懷蘭谷

三畝南湖宅林香雨過時
短籬邊筍早深徑出花遲
問字人攜酒尋幽客對碁
野鷗共無事相近不相疑

客中寄李明府

旅館多岑寂孤燈對此身
青年愁裏過華髮客中新
小雨甘黃菊西風老白蘋
交游滿京國明府獨相親

病中

白頭林下病久與世相違深巷客稀到閒門雲自飛春
寒蘭葉短雨細藥苗肥若問吟邊意勞生總是非

錢塘懷古

運啓錢塘駐紫微奉天文武直金扉南來宮闕鳳初舞
北去山河龍不飛殉骨孤臣埋宿草前朝衰柳對斜暉
客行欲問葫蘆井今日西陵故老稀

石澗

何年鑿玉水潺湲倚石穿雲出柳灣雙澗夾流村北雨
一溪通匯屋前山平分月色浮簾淨相影天光入座閒
短岸桃花吟坐晚白鷗相對欲忘還

江村讀隱

茅屋深村江水流讀書長日坐江頭柴門織妾晨敲火
柳浦漁公夜寄舟籬菊淨開三逕雨渚蓮欲老半池秋
孫康未得其中趣釣月蘆花狎海鷗

看菊東村

對菊東村天氣清微吟半醉鶴隨行少年最恨花無語
白髮方知酒有情夜卧小窓寒雨過曉看深徑綠苔生
青山只在秋江上何事通宵夢不成

九日登龍門寺塔

玉堂山下龍門寺寶塔丹梯九日登歌起宿檐雙桷鶴
笑看埽葉一間僧雲邊垂白飛巖水江上搖紅小殿燈
欲采茱萸望鄉國一行征鴈樹層層

登北高峯訪僧不遇

短衣小轎入湖村漸上高峰步步痕經閣竹邊斜有路
僧房雲裏半開門花深洞口啼山鬼日晚巖前見世尊
欲問老禪方丈去火溫茶竈一瓢存

先櫟軒先生

先生諱端字文正嗣六世祖也先生少授大父父遺
經益博學善詩古文詞為人風儀脩整進止有尺寸
郡太守重其名請為鄉校五經師從學日衆諸大人
邑子俱嚴事之前此凡以儒士試于鄉即不中式亦

得歸補學生從讀書齋舍先生以身為人師不得北面更居弟子之列每試于鄉其歸輒謝不赴學里中謂以傳經啓後為任若宋弘之章文重諸先生俱是也然學者至今稱師道甚尊必首李先生焉先生既為布衣祭酒日從里中耆舊觴詠相集更與金太僕先生倪高士學博魏先生交最深方是時國家盛平島外諸國率由海道入貢先至鄞鄞起嘉賓館接諸貢使諸使至則聞先生名重俱購其文歸時得先生

所言贈行其國中以為重先生天性高淡無所嗜聞
居著書怡然俯仰然其處家益嚴足為士族法與二
弟同爨至長子孫四子諸孫各命以耕讀朝夕奉教
誨左右家居城東砌街別有草堂在東臯佳山水處
舍外善田百餘畝每春日先生至草堂輒身束帶課
耕嘗自題于壁曰四子之資有宜耕有宜讀五畝之
宅半在邑半在田誦其遺言風流猶可見也

先櫟軒先生詩有重名而家乘及諸詩選所錄僅此

越世二百年再經喪亂即後人亦無從綴拾遺文深
可嘆也家乘載里中諸公輓先生詩如范公麟曰一
筇花塢斷三雅日湖空屠公瀟曰鏡中華髮無來往
庭外青山謝主賓周公相曰渡海詩傳百濟去及門
業盛五經分陳處士鵬霄曰浮白何人開韭席踏青
無地試芒屨楊公叔通曰高舉已傳從鶴御冥心早
見製荷衣俱一時名作可傳也

即事呈倪味易居士

結廬迴衆水，憑几坐來頻。
花嶼有餘樂，草庭無限春。
初烟侵壁細，小鳥出林新。
幽興誰相洽，還知愧隱淪。

送日本使僧歸國

鬪場曾得識，高顏杖盍蕭。
然世外閒已向，擅林脩白業。
更攜瓢史歷，青山肩挑雲影。
江頭別衣帶，天香海上還。
到日賢王如有問，八方職貢列朝班。

題壁

敝廬不遠徑，紆斜門巷蕭。
然處士家老圃，雨中生韭葉。

小庭風過發桐花扶身只合攜鳩杖過客何妨駐鹿車
日暮新詩吟未定月光似比昨來加

甬上耆舊詩卷五

欽定四庫全書

甬上耆舊詩卷六

監察御史胡文學編

訓導魏先生傳

先生字達卿別號雲松父安以世勲為寧波衛指揮
先生少負異才讀書日記數千言上自六經下至諸
子史俱肆力而闡索之遂以文章名世為諸生次貢
廷試第一授石城訓導一時奉為人師會有顓冠當

事知先生才使將兵禦險賊不敢犯弘治初以秩滿告歸初里中諸名公卿若屠襄惠公瀟楊康簡公守隨俱深相推重每稱雲松先生至是乃共奉為耆會祭酒以詩文相和答前後二十年同里重之先生性篤孝友動以聖賢為法生平事本于義而以其學濟之與人交溫然易接未嘗有疾詞遽色至以利誘勢怵則屹然山立不可動既博極羣書常精考古今得失而驗之于身持論未嘗無本文章務法唐宋大家

不喜為詰屈年至垂暮尚以立言自許學者宗焉先生初與董山李公交最善既疾革李公候之先生强起正容與相對既退謂子敖曰吾得無昏憤失言取愆于君子耶其始終不亂有如此初李公嘗與黃南厓先生溥共約先生為四明詩文選未幾而先生病矣以致前輩文章散軼實在此時益知纂述之不可後時也先生前在石城時諸生日誦其詩因刻以行世所謂松雲詩畧是也他所著若讀史編經書僅悟

間見類纂小史諸書藏于家

余讀諸家所選雲松詩意謂先生名重其妙當不止此後從范氏天一閣得雲松詩畧始嘆一時名公卿共推重先生為不誣也但歐陽鵬所選于三千餘首中止錄三百四首其所遺必多佳者至先生歸田二十餘年與耆舊諸公所相倡和俱在詩畧以後竟不復得傳然則即先生詩其存者亦以僅矣

君馬黃

君馬黃臣馬斑導君馬躋太山君馬輕矯臣馬臨險艱
艱哉巖棘路石磴夷可陟力未殫顏奈何致行惻虎狼
羣躍鼯猩競咷正途不復臣馬其凋雖君馬良不可以
久勞

白苧詞

新裁白苧衣白苧白于雪佳人舞香風白鳧綠水驕秋
月佳人顏色如桃花系出楚邑東隣家清歌妙舞無與
偕誰錫紫玉九雛釵不錫釵情較可馮姬遭妬誰將安

檀口自激揚柳軀徒婀娜寧若舜牀之側二女果

燕銜泥

燕燕不木栖何事飛銜泥飛銜泥欲生子人家梁上營
巢壘往來傍主飛不止百鳥俱避人唯燕與人親秋社
領雛去春還尋舊主主家縱是貧屋在仍相處君不見
富貴歸心貧即變吁嗟不若銜泥燕

夢仙歌

紅雲何處盤五城洞房夜半連蓬瀛石楠瑤草徑曲折

斜飛露脚天風輕
顏若茗榮金骨老
駐鸞借問遊深島
寶殿千官粲作行
朱硃煉得無為道
十二樓開珠翠藂
玉妃驕笑迎黃龍
俯見齊州塵九點
何如秋著酣芙蓉
王生喚日吹鶯管
紫河車子歸心斷
欲發靈臺一粒丹
人間萬象空春暖

王昭君

王嫱有豔色
天下花不如
飭身不自銜
寂歷閒宮居
此時漢皇方
召幸丹青託
人謂如鏡誰
知宮女輕
黃金圖

像增妍偏稱心妾名一朝去妾身留不住琵琶馬上斷
愁腸漢日迴看淚如注妾命薄冒黃塵慎勿勞吾皇神
畫工誤妾何足算世有妨賢病國人

寒夜行

寒月蒼蒼度青冥寒光徹地寒如冰冰山雪嶺競峻嶒
美人何處留雲軒獨掩蘭房滅孤燈朔風故紙悲窻櫺
擁衾愁思無所憑無所憑情轉悲月中雙鴈鳴相隨此
身中路當睽離

少年行

檠弓插羽氣如虹
白馬翩翩過市中
解射飛鵬向沙磧
姓名近報建章宮

十八灘上歌

選三

萬古青山青不休
白雲常是戀山頭
人生莫似灘中水
日夜滔滔只下流

水中亂石立森森
急溜盤迴一派深
深山鳥任呼行不得
舟行自古到如今

卷六
鷓鴣百數暴沙洲飽食溪魚得自由若被老漁收拾去
千拘萬束日生愁

竹枝詞

綠竹繞江江水流朝朝暮暮只如秋不知世上炎涼異
有鳥幽栖在上頭

幾處行船幾處商瞿塘如馬險難當船行可避瞿塘險
自是人心不可防

鷓鴣對對戀蒲茸郎去家門不記儂野李野桃飄落盡

上灘莫遇石尤風

好花到處引商船
月子三迴缺又圓
郎逐水流常不返
儂如百丈為郎牽

宮詞

著霜宮樹錦離離
強捲珠簾泪暗垂
欲寫愁懷秋葉上
風飄恐被外人知

答栗軒周立德先生見寄

園林對芳菊
慊慊增別懷
遊人在遠路
歡燕不得偕
俯

聽螻蛄鳴仰視鴻鴈飛氣候忽復易斂衽起徘徊寓形
一世間離合固難齊清尊沈綠醕采芳欲遺誰叩門有
遠客言從海上來贈以瑤華音諭以長相思相思兩意
然杳杳各天涯嘉會良有日崇德以為期

襍詩

達人有大觀僻處胡局促遙登太行山欲騁千里目緩
策遵正途岐徑咸紆曲褰裾執我斧去穢生嘉木鴟鵂
叫聚薄虎豹嘯深谷矢心良弗諼歲暮期歸宿

寶劍篇贈章給事元益

雄劍須鐵英良工鍛鍊成銛鐔淬碧水瑩鍰發堅硯差
差動陰縵耿耿開陽精奇名劣紫電碩價羞青萍龍光
遠繚繞虎氣高崢嶸手持慨無敵腰佩誇有靈君子願
自衛萬鎰勤相徵豈容韜玉匣蚤見歸彤庭飾以黃金
鞘絡以赤絨纓剗彼邃山犀斷彼滄海鯨鬼母悲斂跡
神奸慄藏形昕夕置左右天下歌雍平匪徒異三尺巨
闕奚足稱

憲副黃公自立四友亭

友道日湮落桃李情紛如息駕遂常分養晦田園居脩
竹八九本勁松一二株山梅亦其伍幽樹縱橫舒茅亭
何小小翼然臨清渠古色照窻几高香散座隅遂斷塵
煩紕偃仰甘與俱物性契我情澹然非相疎天真自不
易莫景恒猶初洞察齊物理斯類俱吾徒

常山縣至玉山縣山行七十里

軋軋昇肩輿沙徑平如案紆迴萬山下景色佳可玩石

隙泉琴悲苔文岩綺粲澗花炫日吐谷鳥逐人喚山開
衍平畬麥秀青霞散峽隘樹陰暖嵐深愕黎旦絡繹旅
人行纍纍狀珠貫我非名利徒曷足興遐歎

寄永豐范教諭冕先生

炎首雨生涼莎雞作秋語荒寂亂山中氣候殊吾土子
宦同一方去路幾何許相望不得親晨夕縈愁緒溪月
如我期谷雲為我侶綴文豈徒然青冥棄遐羽知音諒
此懷落莫將誰處

盤谷圖

亂峯疊嶂高接天蒼樹白雲斷復連岩磴盤迴到深谷
茂林噴沫飛寒泉泉甘土肥乃佳處自昔何人此中住
愿也獨忘名利情巾車短褐隨烟霧列壑可樵溪可漁
石田種樹兼著書陸海風波險不及夜窻夢與巢由居
鴻飛冥冥弋何慕世人少有知其故桃源遐躅豈為仙
盤谷只今誰問路

董孝子墓古栢為暴風雨盡壞枝柯嘆

孝子祠傍老松樹蒼然獨守漢時墓連蜷勢作蛟龍騰
翁鬱陰蒙鬼神護勝日每出城南遊愛看故物偏遲留
半天涼意散原野五月六月疑深秋歲時世道幾回改
拔地摩空鎮常在能敵連年風雨狂可堪昨夜枝柯毀
夜來颶惡山為傾蔽牛怪木皆縱橫望中巨幹直不仆
太息乾坤無盡情

題雲山晚景圖

南山夜雨芙蓉碧半壑浮雲弄晴色宛在匡廬欲曙時

溪流漠漠無行客
小村社樹八九家
葦門靜掩山月斜
遠寺僧鐘響初歇
烟消蘂薄啼春雅

石城寄故鄉親友黃貳憲諸公

豫章一水到贛州
正在十八灘盡頭
溪迴逆溯石城去
激灘險瀧百餘處
亂山起伏千萬層
石城天上攢雲樹
翠峭丹巒四面圍
野花遞發山鳥飛
縣道荒荒土城小
人家落落晨星稀
素王宮殿城北山
講堂門徑榛莽間
恭視僕夫效艾埽
談經不許諸生閒
少師楊公此發跡

文皇召相姚宋匹風雲變化良有時一曲長歌楚天碧
得興聊為山水遊瘴嵐滅盡嘉雲幽天馬岩南石笋拔
仙姑嶺背溫泉流騁望直凌烏石嶂陸海接天山疊浪
四明咫尺欲奮飛故人不見空惆悵即將裂素傳信音
勁風吹落鄞江濤也知官冷著書暇無奈懷鄉千里心

百舌吟

晨星睽睽殘月低衆禽尚睡雅未啼樹頭春鳥復何事
多舌能令聞者迷間關反覆來相勦學盡諸音猶弄巧

不須斷舌勝寒臯任爾能言異吉了飛來庭角向人鳴
我厭如簧不忍聽由來佞舌易入耳讒人在側家國傾
我欲訴天除此禽此禽有時終革音夜間善哉晨賀世
堯庭舜陞鸞鳳吟

為陳秀才悼內詞

鳳冠疊翠懸明珠織金羅服紅繡襦簾第歸家禮相接
小桃春暖蓁蓁葉藁砧未作青雲人蘭炬照書夜向晨
機上香絲合歡錦願製公衣朝主君南塘瀟瀟關關鳥

白頭擬藉薜蘿蕪草暮雨凝寒帶雪飛凋紅墜綠孤棲早
刺繡遺囊蘇合香觸鼻翻教酸入腸謾道流光如走電
一日含啼三二遍婉婉幽情永不遐洞房月照相思花

贛城次韻再答梁邑宰孔昭

壓帳黎雲詩境幽腥涎濡殼慚蝸牛心交小李不惜寶
雷電駭騰蒼海虬朗吟行軒洒蘭雪懷得半規天上月
渭樹江雲遙入顰一絲情繫萬程春

秋蘆翡翠圖

葦花散紫秋塘坳魚虎窺魚坐葦梢水清魚見容易捕
饒心未足愁日暮魚恣食身不肥虛負娟娟好毛衣寧
不為鸞鳳悲

至定海作

江水逼城流城當大海頭浦雲長入市風物早成秋日
出山如染潮來地欲浮扁舟一相過浩興不徒遊

山居即事

傍壑敞茅堂寥寥引興長石崖蜂釀蜜雲碓水舂糧烟

鳥窺人語潭花伺午香柴門客稀到岩徑薜蘿荒

灤州太守薛有年城南別墅春遊用唐人春晚

山莊韻

一選

竹樹漫成隣名家莊上春客今移畫舫主近脫青綸
絡戶亂藤密巢堂飛燕頻琴尊當此地棲息百年人

舟中遣興與隨行黃吉溫繼輩

篷底看書莫登艫散寂寥沙頭催緯僕山下問歸樵
朽木繁如火啼禽聲若貓古人觀物趣多向靜中邀

秋日飲石城黃義官濬清樓上乃子嶽彈琴醉
後因索詩走筆

涼雨過城隈樓頭對酒杯溪連琴操響山作畫屏開
白髮情何繫黃花景自來題詩乘醉興寧待主翁催

漫成

閒來臨白水獨立向青蕪
賞酒留高客題詩避俗夫
野花皆有趣山鹿可相呼
萬事由人作吾貧守一愚

薄暮散步

學寮寂寂倚林垞半隱先生養性靈好客未來同淪茗
殘經已了自開局紫萍斷處水偏碧白鷺飛邊山更青
遠契羲皇千載上為迎新月步中庭

輓長清李處士

芭屨竹杖謝風烟江郭南頭卧一廬別館花開人醉酒
小窻月照客成篇誰圖栗里高風散唯有龍門盛會傳
惆悵故人思舊處數聲隣笛夕陽天

江東楊氏半村居

小隱東村第幾家依依郭置生涯官橋側對柴門靜
驛路微通草徑斜近野月臨飛市鶴疎林日出見城雅
著書有暇田園裏笑課兒童學種瓜

追和梅讀楊先生除夕之作翰林維新公索次
韻

年華又向一宵過大地春迴氣漸和佳景得歡宜盡醉
盛時無疫不須憊送窮尚憶唐韓愈高壽空間蜀李何
最是賢郎觀手澤青衫幾度淚痕多

曹娥廟

樹色參差山下村，漢時孝女廟猶存。
雲寒故塚留雅語，雨濕殘碑剔蘚痕。
大義自垂千載重，遺名長擅一江尊。
悲歌未斷西風起，正有潮聲已打門。

六月十二日即景投示金舉人唯深輩

雨添濕熱火雲騰，客舍無從逃鬱蒸。
空憶仙家五鬣樹，欲求番國千年冰。
葛巾挂壁敢科頂，筠簟鋪軒聊曲肱。
想應對景亦如此，更惡撲人多亂蠅。

晴十韻書示鄧麒楊貢諸生

山野照初暎天晴勝事繁
浮光搖遠樹淑氣散多門
絕島雲猶濕高灘水自喧
農蓑收谷畝漁網晒江村
懊惱春將盡芳菲景尚存
冶花迎客笑奇鳥像人言
落絮隨風轉遊絲映日翻
欲尋元亮宅奚慕辟疆園
得句題蕉葉娛情飲竹根
生成皆有分何必問乾坤

冬暖

冬半如春暖疎花滿路開
敝裘須補綴容易有寒來

雨後山園偶成

久雨閉園扉未識春深淺啼鳥破微晴茸茸草如剪

山農圖

山村雲樹幾人家暑雨新晴亂沸蛙農子田頭笑相語
冬青開到第三花

謝顓郡章貳守惠炭

北風吹雨晝模糊笑撥烏薪擁地爐萬戶千門春乍轉
又分餘暖及寒儒

題枝上白頭鳥圖贈石城耆士鄭良頊

雲卧高人鬢欲秋，世情都付水東流。
閒中最愛岩枝鳥，不受樊籠到白頭。

初秋早起作

缺月當空夜未央，荷風細細襲衣香。
半牀卧聽南溪雨，釀得山居一夜涼。

太保屠襄惠公浦

字朝宗號丹山，少才氣銳發為文，下筆千餘言，折其

同輩中進士試監察御史王襄敏公鉞重公才使總
諸道章奏且薦公可大用即擢僉都御史歷右都御
史時占城國為安南所侵其王子來奔公受勅處分
定其國難使人護王子歸國因以金寶器異香為報
公不受其國人至以疏請上命公受之再辭乃止會
吏部尚書闕上手書公名付內閣公黜陟至慎值考
察見以憂去官者非大過不黜註選至瘴遠地多濡
筆不下務以土俗稍宜者補之奏著為令復請起王

端毅公恕與之共事以班在馬忠肅公文升上奏請
後之時多內降官公疏言天下士竭其心力有積數
十年不得官而白身之人緣借蒙幸如拾芥不可以
為訓因得稍減有請開納馬例者公疏言內藏與太
僕見積尚多忽開此例是使人疑國用大耗也恐不
可以示遠議遂格戶禮刑工諸部尚書俱為言官所
論去位公面陳諸大臣不宜輕遂其去執對甚力遂
併致仕歸里正德改元勅召公以吏部尚書掌院時

逆瑾盜政將大起羅織之獄公執不可瑾必欲置劉
忠宣公大戛死公曲為保護得減論當軸二年度勢
終不可回堅請致仕公達治體論事俱得機要生平
常以愛護人才為重處心遜厚自謂手持此筆論獄
生死惟恐誤殺一人掌銓衡進退惟恐誤黜一人嘗
坐部堂令辦事官奉硯公初衣白綾甚澤其人誤傾
墨汁衣上匍伏請罪公笑揮曰去去吾方惡其太白
亦何罪人以方韓魏公有鄉人冒稱屠公子于道請

謁郡縣其怨家發之公呼至但相戒曰汝甘為吾子
置而翁何地耶國法可畏後慎勿為此諸居鄉盛德
事甚多不能具載

題葡萄歌

有客乘槎到西域携將佳種歸中國遙從天上落人間
無間江南與江北插枝容易分根難引蔓何妨多接竹
初看葉吐金忽訝叢堆粟蛇虺縱復橫蛟龍往仍復薰
風自南來雨腳收三伏水晶倒垂驪珠奪目馬乳千堆

鴛漿百斛味兼醎
酬價重醞醖久渴既枯高卧方足請
進一拌目饒于腹憶昔陳叔達嘗親感主哭復有李元
臣持獻表芹曝千載忠孝名後世誰能續鄙哉孟扶風
一斗換州牧張讓亦何人姓氏污簡牘橫涇陳公名太
守賢孫磊落人如玉傳家既已飫詩書更有餘閒工戲
墨殷勤寫贈友梅翁屬我題詩詩滿幅咀毫不覺口流
涎忽報翁家酒新熟

至永定衛

遠見太行聳翠鬟馬蹄穿過萬重山幾家樓閣寒雲裏
十里城垣夕照間村市烟微商客少柳營人靜甲兵閒
夜來驚起還家夢猶記猿啼百丈關

題涵碧亭

一池新水碧于苔構得幽亭傍水開六月不知天有暑
四時長喜地無埃倚欄下看星芒轉捲幔先迎山翠來
何用別求仙藥去此中風景即蓬萊

壽沈石田先生八十

昔年曾擅筆中花載酒詩成句句佳到處奚囊堆綺繡
有時出語帶烟霞曹劉牆短通三昧李杜壇高共一家
瑟縮寒童過橋日幾多詞客盡驚誇

公自註曰先生題
景有瑟縮寒童懶

過橋之句為
詞家所誦

讀此詩知公與沈先生詩韻往還其相企重久矣初
弘治中公為太宰上以從岷王所奏命逮知州劉遜
科道龐泮等交章諫阻上怒盡繫之獄時碧川楊公
為宮詹移公書謂科道一時被繫公大臣即當論救

不宜遽使官攝其事後六日上竟從公言釋泮等于
獄而楊劄則已傳于世矣至正德中公再掌院從都
下見沈石田集有咏楊宮詹與屠太宰論事劄子語
多相刺公一笑為具述其事次韻答之末曰我欲到
虎丘携酒追吟蹤願言保遐壽待我談始終蓋公和
石田詩在十年後時石田年八十二至次年九月公
解組過吳門而石田已于八月捐館矣余因嘆石田
以一布衣能直論當軸元老無所諱然公與石田雅

舊既見所刺雖答詩解嘲而復願石田遐壽欲面陳
始終得生白于長者前輩風流俱足重也其詩今不
備載

太子少保工部尚書楊康簡公守隨

公字維貞號貞菴性強樸師大父栖芸先生事兄文
懿公友弟碧川先生問學出一門以進士授監察御
史他御史有在權貴人門為相招延公謝不往數上
陳時事劾奏姦僧繼曉妖術罔上之罪直聲大震出

按江西有大猾李孜省者能變幻為暴于鄉里公按其罪當戍遣孜省脫身走京師結中貴以左道惑上遂得幸公服闋赴京孜省已為太常寺丞公復劾奏孜省罪人不宜典郊廟百神之祀改上林苑監然孜省益貴得用小簡奏百官賢否竟以事誣公斤守南寧弘治初遷應天府尹以治守脩太監蔣琮罪反為所噬謫廣西叅政七年不調已而歷遷至大理寺卿進工部尚書掌寺事與劉公大夏馬公文升韓公文

並朝野之望各勵風節正德初年巨璫劉瑾等在上
左右日擅政會中旨取戶部餘鹽四十萬充內用韓
公率九卿廷諍傳旨此何大事遽爾伏闕公退謂諸
大臣曰果然天下事甚有大于此者今八虎相扇為
惡恣行不軌勢危社稷奈何舍此不言韓公乃更具
疏會衆伏闕下請治瑾等罪得旨處分命瑾掌司禮
監諸璫出筦機要公曰禍益大矣乃專疏曰臣等力
陳諸璫之罪謂必立正國法今反授以政事根本之

樞兵財機務之地陽為遠放而陰近之名為疎斥而實親之政柄一入其手將來事勢必有不可言之事伏願陛下乾綱獨斷立誅此數人遠鑒延熹既往之愆無使臣蹈蕃武已覆之轍不報瑾積銜入骨遂傳旨勒公致仕即日乘小車就道瑾怒不已矯詔罰公出米千石輸邊削奪官秩追繳出身以來誥勅再罰米二百石公家無餘財至粥先人遺田請貸兄弟一簪一衣不得留尚輸不給瑾伏誅復公原官臺省交

章論薦公竟不復出惟與里中諸高年結為耆會幅
巾絳履日徜徉山水間身敦禮義為士族法得年八
十有五卒之日士大夫走哭父老聲鐘相吊詔贈太
子少保謚康簡

將赴應天府丞家兄維新出餞深溝寺和韻

送別招提境紛紛車馬闌酌先論去客醉後愛逃禪池
草方成句天花亂入筵他年來報政依舊雁行聯

按察副使張公曷

公字仲明號棟莊又曰寓菴生有奇質性剛自為諸
生時已能自樹立中進士出知鉛山為治勵心勤力
時縣中有加稅田數百畝歲輸至數石公以為不平
乃身出視田疏請均諸縣中方公出見界上有大樹
下蔽二十餘畝不得耕公謂蕪田可惜當伐之從吏
父老俱諫謂此樹神叢不可犯公怒擇日具鼓吹甲
而往手揮巨斧砍之血隨斧出三日樹始斷其巔有
巨巢墮三婦人絕而蘇自言為風吹至樓上與三少

年俱不知身在樹巢也驅之還家縣俗尚巫有巫厲
人能隱形吏莫敢捕公遣伺馳至其家以縣印加背
上衆箠之立死公乃盡毀諸淫祠逐巫移文道路使
享祀以禮有節婦子為虎噬具牒控虎公即移檄于
神與約五日繫虎至及期有二虎伏門外公挾弓矢
出遙咒虎曰誰殺吾民當受死無罪者免其一虎即
斂尾去一虎仍伏公抽矢三發俱貫虎首遣人舁虎
尸歸節婦家一縣稱為神君諸異政甚多不可盡錄

秩再滿徵為南京監察御史益勵風裁時威寧伯王
鉞挾其武力與保國公朱永太監汪直將挑釁北邊
公曰是為國家害不小即抗章論之復劾守備太監
蔣琮鬻放軍伍罪琮等遂誣公擅作威福謫通政司
經歷尋以魏國公薦遷四川按察僉事進副使同事
馬太監信姦人周慧為能治黃白將進之朝公驚曰
是唐之柳泌也即捕慧論罪徙之極邊公自度終不
為世容乃和歸去來辭力請老定家于鄆之棟莊舍

壁蕭然出入惟徒步即糠粃時不給而杜門著書雍
容自得都御史王公璟以賑至奉公百金公再辭不
得乃受下戶飢民例一分以答其意郡守周公坤過
訪見堂設敝牀嘆曰國有顏子公之謂矣鄞令丁君
鉛山人至即以父禮事公晨夕候興居為具蔬食公
謝曰吾誠不給芋栗奈何以此煩令君堅不受久之
炊烟屢絕家人至不能忍餓其夫人乃出一金珥易
米公問所從來夫人曰此令君奉我無預公事公給

取視之投于河卒年七十有八至含殮不具郡守令
共經紀其喪所著有歸田集棟莊集寓鳴集經史訓
戒一百二十卷

余嘗覽古為政若西門豹投巫童恢治虎罪得一異
輒傳之史冊今讀張公異政錄至不勝書斯所謂神
明之宰矣公生平胃懷如冰雪不可小污利害禍福
無待解遣而自不能滯其中喜獎勵後輩常以道義
相期通政余南湖先生本親炙侍教有年及公疾革

余先生尚侍側更張目眎曰善自愛方今人才肯自
勵者少若能扶持一日是培國家士氣一日也其立
身報國之誠至死不倦豈不誠卓犖大丈夫哉即百
世而下得聞斯言猶當感激強自立者也徒傳公異
政抑末矣

答家大人

公為令時父錦衣公以一詩戒之公
和答即用其起末句知公所承家訓

矣

阿曷為官出宰鉛蕭然消息祇虛傳敢圖魯令傳三異

應效劉公取一錢故國桑榆留晚歲浮雲名位聽高天
種瓜未必東陵好賴有遺安數畝田

寫懷

溪邊岸幘醉醺酥此後殘年有亦無中夜靜聞風雨過
只將燭影照身孤

山色

層層雲起上峰顛花樹叢開鳥路鮮我欲問春何處去
不知春色在山前

按察副使黃公隆

先生字自立以進士授南刑部主事初提牢夜坐庭
中有從垣外投一青囊入先生不發次日持白尚書
楊公寧發視俱白金乃湖州糧長求釋繫者由是知
名遷廣東按察僉事甫浹旬流賊入境公盡力禦之
賊遽去撫軍葉公盛甚稱其材畧改福建再以治行
受壘書旌異時中貴黃賜勢焰侵人公卿俱為其母
上壽先生獨不往遷四川按察副使到官謂治蜀當


以趙清獻為法即立祠本司門左日得仰止松潘與
土番接壤轉輸內地率費十致一先生議開屯田以
內糧易銀軍民稱便遭父喪歸里遂不出先生性剛
直生平持操若一未嘗緇一塵家居二十餘年手種
竹栽梅花十餘本間以蒼松與已而四乃築四友亭
日觴咏其中年七十三卒所著曰南谷集

吾鄉前後耆舊會俱一時詞家而所傳詩未嘗有及
會事者近得南谷先生一詩有曰耆英會數常忘約

始知當時諸老會期甚數而詩俱失傳此李司空所以太息也

和屠中丞朝宗見贈即事

年華轉眼似飛蓬投老無心戀萬鐘
數畝青山看不厭半窗紅日卧猶濃
耆英會數常忘約故舊書閒未啓封
幾信棟花風又到莫辭携酒更相從



甬上耆舊詩卷六